



中國古典文學基本叢書

劉克莊集校

第十一冊



中華書局

中國古典文學基本叢書

# 劉克莊集箋校

第十一冊

〔宋〕劉克莊 著  
辛更儒 校注

中華書局

# 劉克莊集箋校卷一一五

按：本卷爲表箋，起度宗咸淳三年（一二六七）丁卯四月，迄四年戊辰五月所作。後附端平元年（一二三四）甲午迄二年乙未所作諸表。

## 表箋

### 丁卯乾會節賀皇帝表（二）

上天祐之，開千齡之景運；聖主出矣，得萬國之懽心。俯效葵傾，仰祈椿算。臣某中賀。恭惟皇帝陛下，昭事上帝，懷保小民。於邦於家，躬勤儉而繼禹；在朝在野，願富壽而祝堯。休祥允叶於電虹，難老益繇於箕翼。臣耄期已迫，善頌未忘。負宸大听，恭己端臨於南面；稱觴廣內，承顏長奉於東朝。

#### 【箋注】

（二）題，丁卯爲咸淳三年。此咸淳三年四月作。

## 賀皇太后表

辰居北極，鴻基續列聖之傳；風轉南薰，龍袞上太皇之壽。兩宮慈孝，萬國懽呼。臣某中賀。恭惟皇太后陛下，謝邑流芳，周京儷美。受遺先帝，決大計而無疑；復辟嗣王，推成功而不有。際電繞虹流之旦，綿天長地久之期。臣髮已皓蒼，心猶丹赤。夢鈞天之燕，曾侍禁嚴；觀長樂之儀，自嗟遠外。

## 賀皇后箋

帝臨五位，出乎震之初；后冠六宮，取諸坤之順。椒塗有助，椿算無疆。臣某中賀。恭惟皇后殿下，樛木垂慈，澣衣昭儉。紀千秋之節，若開元間；形四方之風，自周南始。欣逢華旦，不擁蕃釐。舜鼓琴而歌，適屆薰風之候；姜脫簪而諫，何待晏朝之時？

## 丁卯壽崇節賀皇太后表

文母內理，方詠思齊之詩；天子有親，特置誕彌之節。累朝盛觀，萬萬頌聲。臣某中賀。恭惟皇太后殿下，比德姜任，游心黃老。降生神異，浴佛之日同，援立聖明，補天之功大。光增典策，茂介壽祺。臣猥以暮齡，際茲華旦。僅遺一老，退休履道宅之居<sup>①</sup>，莫尾百僚，旅賀光順門之下。

【校】

①「遺一老退休」，「遺」，原闕，據明抄本、四部叢刊本補。「休」之前原有「守」。據上二本刪。

【箋注】

（二）題，此咸淳三年四月作。

## 賀皇帝表

母儀綦貴，產祥臨衣之辰；聖德何加，置節如垂簾之禮。一人有慶，萬國懽心。臣某中賀。恭惟皇帝陛下，御時乘之龍，見王治之象。方先帝選佩觿之幼，曾未探符；知冲人膺當璧之占，端由定策。既負黼宸而正南面，宜奉玉卮以壽東朝。史冊輝煌，頌聲洋溢。臣昔叨扈蹕，今已扶犁。庭堅詠欽聖之賢，尤高復辟；臣弼勸英皇之孝，可謂愛君。

## 賀皇后箋

贊先猶而與子，聖矣東朝；執婦禮以事姑，孝哉中殿。欣逢誕節，仰頌徽音。臣某中賀。恭惟皇后殿下，風始自南，教修乎內。脫晏朝之珥，周道再昌；稱長樂之觴，漢儀復見。顧慚衰竭，莫極形容。今爲老農夫，難旅拜玉墀之下；昔掌太史氏，或能補彤管之遺。

## 郊恩進封開國伯加食邑三百戶謝表<sup>(二)</sup>

冠掛四朞，屏居舊里；爵加一等，適際初郊。自慚短褐之微，遂忝躬圭之寵。臣某中謝。伏念臣奮由孤士，被遇先皇。導袞龍而行，密依黃道；草金雞之赦，見獎玉音。空懷老臣畎畝之忠，阻侍英辟壇垓之祀。雖云得謝，猶許均釐。

茲蓋伏遇皇帝陛下，一德享天，小心事帝。誕敷祭澤，不遺耆舊之倫；中錫綸言，俾列公侯之次。茲惟殊渥，匪曰常彝。臣桑蔭無多，菜封逾厚。士奉璋亞裸，莫小助於類禋；伯執殳前驅，恨既愆於膺力。

### 【箋注】

(二)題，咸淳三年正月一日行郊禮，後村進封開國伯，當在其後。本書卷一二〇有進開國伯謝平章啓，據宋史卷四六度宗紀，賈似道爲太師平章軍國重事在咸淳三年二月乙丑，是則進右謝表必在是年二月之後。

## 謝皇太后表

國有大慶，五時熙成；臣無微勞，一階序進。出綸北闕，奉表東朝。臣某中謝。伏念臣疏遠諸生，遭逢先帝。席前宣室，深慚賈誼之才；蹕幸甘泉，嘗奏揚雄之賦。今作老農夫而屏處，阻陪新天子之親祠。溥被渙恩，端由坤載。茲蓋伏遇皇太后殿下，禁中定策，物表怡神。祀后稷以配天，縟儀初講；朝太任而問寢，孝治最隆。臣雖既垂車，猶叨賜胙。罔功食菜，虛忝韓子昌黎之封<sup>①</sup>；送老把茅，莫第漢臣長樂之頌。

【校】

①「韓」，原作「朝」，據明抄本改。四部叢刊本同原本。

## 壽崇節賀皇太后表<sup>①②</sup>

東朝華旦，承顏極孝治之隆；南面至尊，上壽用家人之禮。臣某中賀。恭惟壽和皇

太后殿下，自嬪媼訥，允媚周京。望蒼梧雲，既莫返重華之狩；取虞淵日，獨高安漢嗣之功。有開聖出之祥，適協佛生之旦。懽騰萬宇，喜洽三宮。臣景薄西嶷，神馳北闕。踰知列辟，咸陪光順門之班；虛忝從臣，莫第長樂宮之頌。

【校】

①題，明抄本題下有「戊辰」二字注。

【箋注】

（二）題，此爲咸淳四年四月所上賀謝太后表。

## 賀皇帝表

祥開堯母，生與佛同；祉受文孫，德由世積。際天覆幬，率土懽呼。臣某中賀。恭惟皇帝陛下，視膳而問安，承顏而順色。謂親劬難報，猶寸草答三春之暉；願聖壽無疆，若蟠桃結千歲之實。惟今之盛，亘古所無。自愧情荒，莫能摹寫。臣雖棲衡泌，猶戀軒

墀。耆老而守元經，已甘寂寞；悅懌而秉彤管，莫頌音徽。

### 賀皇后箋

正母儀於中闈，來嬪帝出之初。執婦禮於東朝，適協佛生之節。照臨所暨，舞蹈攸同。臣某中賀。恭惟皇后殿下，德比姜任，賢如馬鄧。子無嫡庶<sup>①</sup>，鳴鳩之愛則均；俗有北南，關雎之化咸被。臣雖老尚望雲而就日，已盲難披霧以覩天。安得金篦，爲祛於翳膜；恨無彤管，能極於形容。

### 【校】

①「嫡」，原作「適」，據明抄本改。

### 戊辰乾會節賀皇帝表<sup>(二)</sup>

六龍御天，仰大明之繼照；萬物覩聖，慶今日之太平。介福簡穰，躋民仁壽。臣某

中賀。恭惟皇帝陛下，光明履位，曆數在躬。嗜好不萌，用無逸之圖養壽；緝熙有素，以大學之書正心。誕彌踵文母之期，暇假錫湯孫之祐。數綿箕翼，喜洽宗祧。臣還笏年深，戴盆天遠。餘八十歲，不在申公之多言；薰一瓣香，有封人之三祝。

【箋注】

（二）題，戊辰爲咸淳四年。

賀皇太后表

休符叶應，有王者興；盛德蔑加，以天下養。於今創見，自昔罕逢。臣某中賀。恭惟壽和皇太后殿下<sup>①</sup>，輔佐先皇，贊成大計。始於庭埋璧，未占已孚；晚以易洗心，退藏於密。凡戴履均愛君之念，矧誕彌同浴佛之辰。臣久掛衣冠，未忘軒輅。追蹤二雅，儷美思齊之詩；稽首兩宮，敬上封人之祝。

【校】

①「壽和」，原闕，據明抄本、四部叢刊本補。

## 賀皇后箋

聖握乾符，龍御天而利見；德侔坤載，馬行地以無疆。和氣旁流，頌聲交作。臣某中賀。恭惟皇后殿下，倪天作妹，夢月入懷。儼極體尊，常同玉輦；進賢志切，姑酌金罍。與國同休，後天難老。臣自憐大耋，莫覩太平。着李白之錦袍，曩叨供奉；薦子昂之奎壁，今愧荒蕪。

## 賀生皇子表

帝祉施子，積善所鍾；震索得男，非常之慶。縣區欣忭，磐石莫安。臣某中賀。恭惟皇帝陛下，系本承堯，服如纘禹。龍飛御極，統方接於千齡；燕翼貽謀，仁已流於數世。澤覃華夏，和滿乾坤。臣側聽熊占，莫陪虎拜。覩聖人作，幸逢景運之開；聞皇子

生，竊有先儒之喜。

【箋注】

〔二〕題，宋史卷四六度宗紀：「咸淳四年冬十月戊寅朔，日有食之。子憲生。」

賀皇太后表

聖何加孝，思仰悅於慈懷；子又生孫，兆非常之大慶。懽騰寓縣，燕及廟祧。臣某中賀。恭惟壽和皇太后殿下，復辟道尊，齊家德盛。昔螽斯託詠，欲王室之宗強；今熊夢協占，本慈闈之家法。隆平盛觀，希闕罕逢。臣謝事有年，酬恩無路。耳聞宮掖<sup>①</sup>，聿開甲觀之祥；目斷鈞天，莫待瑤池之宴。

【校】

①「掖」，原作「振」，據明抄本改。

## 皇后箋

樛木之章，猶慤勤於嬪御；椒塗之義，欲繁衍於本支。皇嗣挺生，熙朝創見。臣某中賀。恭惟皇后殿下，手操彤管，躬奉玉璽。熊夢吉祥，雖當宁多男之兆；螽斯盛大，皆宮中逮下之仁。閭範淑賢，邦基鞏固。臣垂車雖久，戀厯未忘。昔忝祠官，嘗獲待高謀之際；今成瞽史，安能絃關雎之詩？

## 除龍學謝皇帝表<sub>(二)</sub>

明詔德音，親逢真主；隆名美職，假寵耄臣。臣某中謝。伏念臣曩者以小文章，當大典冊。陪羣英而並進，受先帝之異知。雄斷廟謨，想寶儀之謹重；片文隻字，通楊億之商量。上所揆擢，臣皆巾襲。及乎鼎湖龍去，空抱遺弓；沙苑鶴歸，幸逃飛矢。曾是老書生之衰颯，忽蒙新天子之訪求。今細札十行，何其詞旨溫厚？昔萬機參決，得之耳目見聞。歸爲版籍之民，躡進淵圖之直。

茲蓋伏遇皇帝陛下，福威惟辟，曆數在躬。謂時無老成人，典型寢少；若古有耆壽俊，圖任不遺。雖迫耆昏，許班華近。旁觀駭甚，內省矍然。臣易泯餘齡，難酬洪造。陪西清列，願生死於蠹魚；誦北山移，免怨驚於猿鶴。

### 【箋注】

（二）題，後村行狀：「咸淳四年五月，今上念先朝遺老，御筆：劉某謝事先朝，年德俱高，特除龍圖閣學士仍舊致仕。人謂嗣聖將起公矣。」

## 謝皇太后表

一壑釣游，旄期踴颯。兩朝謨訓，禁秩岩堯。昔逮事於先皇，今歸恩於太母。臣某中謝。恭惟壽和皇太后殿下，赤城孕秀，黃閣傳芳。法駕屬車，方謹長樂膳安之問；遺簪墜履，尚憐穆陵詞翰之臣。鬢雪皤然，條冰清甚。臣偷生旦暮，莫報乾坤。掌寶度之秘儲，昏眸莫覩；沾瑤池之餘瀝，凡骨難仙。

## 謝皇后箋

黃卷青燈，駒陰猶惜。赤文綠字，犧畫有光。足爲晚歲之榮，悉出長秋之賜。臣某中謝。恭惟皇后殿下，一門世德，四海母儀。念彼勞臣，爰有金壘之酌；書之女史，孰如彤管之徽？已迫衰殘，俾參嚴近。臣三年自誓，萬死莫酬。龍馬呈祥，垂老獲登於奎閣；鶴猿生怨，終身不負於草堂。

## 代作

### 擬謝宣召人院表代西山<sup>(二)</sup>。

君命不俟駕，忽誤忝於招延；王言出如綸，俾進專於潤色。光生閭巷，榮動縉紳。臣中謝。竊觀列聖之用人，惟待詞臣而加禮。蓋於言語文字之外，責以論思獻納之忠。始雖忤旨而弗容，終乃棄瑕而復用。修除翰苑，在環滁出守之餘；軾侍禁廷，亦赤壁歸

來之後。豈非加歲月則其文老，經憂患則其慮長？遂居邃嚴，以備顧問。

如臣者，才華不競，愚戇自將。掌先皇內制者六年，每慚越俎；迨陛下初元之再命，竟許循牆。以馳驅州縣之頻，加廢放山林之久。見聞寢少，藝業益荒。結茅屋於雲邊，已甘終老；瞻玉堂於天上，若隔前生。敢圖白首之重來，過辱清衷之妙簡。遽玷久虛之拜，真成三人之榮。茲蓋伏遇皇帝陛下，肆筆成書，解絃調瑟。謂王者之志見於詔，不亦大哉？而天下之動鼓乎辭，豈容默已？宜有文章之宿老，俾專典冊於明時。奚取臣愚，乃承人乏。臣敢不推明上指，播告多方<sup>①</sup>。小技未爲尊，良有慚於詞禁；大節不可奪，冀無負於聖朝。

【校】

①「多方」，原闕，據明抄本、四部叢刊本補。

【箋注】

（二）題，右表及以下二表，或皆爲後村端平元年居福建安撫司參議官期間擬西山所作。